



Saunia e Elder M. Russell Ballard

○ Le Korama a Aposetolo e Toasefululua

Nofo i totonu o le Vaa ma Pipiimau!

Afai tatou te faatumauina la tatou taulaiga i le Alii, ua folafola mai ia i tatou se faamanuiaga e le mafaatusaliaina.

Talu ai nei, sa ave ai e sa'u uo sona atalii i se folauga i lalo i le Vaitafe o Kolorato e oso atu i le itu tatafe o le āfu o Cataract Canyon, i le itu i saute o Iuta. Ua lauiloa le itu tatafe lea i lona sou ma le aave e 14 maila (23 km) le umi lea e mafai lava ona matuai lamatia.

I sauniuniga mo lea folauga mata'ina, sa la iloiloaina ai ma le toto'a le uepisaite a le National Park Service, lea o loo i ai faamatalaga taua e uiga i sauniuniga a le tagata lava ia atoa ai ma tulaga lamatia masani e lē mailoa.

I le amataga o le malaga, sa faamalamalama atu i ai e se tasi o taiala atamai ni faatonuga taua mo le saogalemumu, sa faamamafaina ai ni tulafono se tolu ia o le a faamautinoa ai le saogalemumu o le malaga i vaega tatafe ma sou. “Tulafono muamua: nofo i totonu o le vaa! Tulafono lona lua: ia fai se ofufaaola i taimi uma! Tulafono lona tolu: ia pipiimau uma lima e lua i taimi uma!” Ona ia faapea mai lea, faatasi ai ma nisi faamamafa faaopopo, “Ae o le mea sili o mea uma, ia manatua le tulafono muamua: nofo i totonu o le vaa!”

O lenei folauga ua faamanatu mai ai ia te au la tatou malaga faaletino. O le toatele o i tatou e oo i vaitau i o tatou olaga tatou te talisapaia ai le malū ma le filemu o le olaga. I isi taimi, tatou te fetaiai ai ma le tatafe o le vai lea e faatusatusa atu i le sou o loo i ai i le āfu e 14 maila le umi i Cataract Canyon—o luitau e mafai ona aofia ai faafitauli o le soifua maloloina faaletino ma faalemafaufau, o le maliu o sē pele, o miti ma faamoemoega lē taulau, ma—mo nisi—e oo lava i se faafitauli o le faatutua pe a fetaiai ma faafitauli o le olaga, fesili, ma masalosaloga.

Ua saunia e le Alii i Lona agalelei se fesoasoani, e aofia ai se vaa, ni sapaalai taua e pei o ofufaaola, ma ni tagata taiala atamamai latou te tuuina mai le taitaiga ma faatonuga mo le saogalemumu e fesoasoani ai ia i tatou ia sao atu i lo tatou vaitafe o le olaga e tau atu i lo tatou taunuuga mulimuli.

Sei o tatou mafaufau i le tulafono muamua: “nofo i totonu o le vaa”!

Sa masani lava ona faaoga e Pere-sitene Polika Iaga “le Vaa Tuai o Siona” e fai ma faatusa o Le Ekalesia a Iesu Keriso o le Au Paia oAso e Gata Ai.





Sa ia saunoa i se tasi taimi: “Ua tatou i ai i le ogatotonu o le vasa. A oo mai faafitauli, ma e faapei ona faapea mai seila, ua ia galue ma le malosi. ‘O le a ou le nofo iinei,’ ua fai mai ai se tasi; ‘Ou te le talitonu o le “Vaa lenei o Siona”. ‘Ae o loo tatou i ai i le ogatotonu o le vasa.’ ‘Ou te le popole, ou te le nofo iinei.’ Ua tatala le peleue, ona ia oso lea i lalo. Mata e le malemo o ia? Ioe. E faapena i latou o e o ese mai lenei Ekalesia. O le ‘Vaa Tuai o Siona,’ e ao ona tatou nonofo ai.”¹

I se isi taimi, sa saunoa atu ai Peresitene Iaga e faapea o loo popole foi o ia i tagata ua leiloa lo latou ala ina ua faamanuiaina i latou—a o lelei lena o le olaga: “O le taimi o le malū, pe a folau atu le vaa tuai o Siona i se sau mālū, [ma] pe a filemu mea uma i luga o le vaa, e fia o atu ai nisi o uso i tamai vaa laiti e fai sina . . . ‘au’au, ma o nisi e malelelmo ai, o isi e se ese atu, ae o isi e toe foi mai i luga o le vaa. Sei o tatou nonofo pea i le vaa tuai o le a ia avatua i tatou ma le [saogalemu] i le uafu; e le manaomia ona e popole.”²

Ma le mea mulimuli, sa faamanatu mai e Peresitene Iaga i le Au Paia: “O loo tatou i ai i luga o le vaa tuai o Siona. . . . o loo i ai le [Atua] i le foepuni, ma o le a i ai lava iina. . . . O loo lelei mea uma, pepese Aleluia; aua o loo iinei le Alii. Na te faatonu mai, taiala ma taitai. Afai o le a i ai le talitonuga atoa o tagata i lo latou Atua, ma lē lafoaia a latou feagaiga, po o lo latou Atua, o le a Ia taitai i tatou i le ala sa’o.”³

E tusa ai ma luitau o loo tatou feagai ai i aso nei, e faapefea ona tatou nonofo i luga o le Vaa Tuai o Siona?

O le auala lenei. E manaomia ona tatou lagonaina se liuaina faifai pea e ala i le faateleina o loo tatou faatuatua ia Iesu Keriso ma loo tatou faamaoni i Lana talalelei i o tatou olaga atoa—e le na o le faatasi, ae ia faifai soo. Sa fesili Alema, “Ma o lenei faauta, ou te fai atu ia te outou, ou uso e, afai ua oo ia te outou se liuga o le loto, ma afai ua outou lagona le fia pepese i le pese o le alofa togiola, ou te fia fesili atu, e mafai ea ona outou lagonaina nei?”⁴

O tagata taiala atamamai o aso nei e mafai ona faatatau i aposetolo ma perofeta o le Ekalesia ma taitai perisitua musuia ma taitai o ausilali i le lotoifale. Latou te fesoasoani ia i tatou ia taunuu ma le saogalemu i loo tatou taunuuga faaii.

Talu ai nei sa ou lauga ai i le semina mo peresitene fou o misiona ma fautuaina nei taitai:

“Ia faatumau le taulaiga a le misi-ona i taitai o le Ekalesia. . . . O le a lē mafai lava . . . ona matou taitaiseseina [outou].

“Ma a outou aoao atu a outou faifeautalali ia faataulai mai la latou vaai ia i tatou o taitai, aoao i latou ia aua lava nei mulimuli atu ia i latou e manatu e sili atu loo latou iloa i le auala e taitai ai mataupu a le Ekalesia i lo le . . . Tama Faalelagi ma le Alii o Iesu Keriso” e ala i taitai perisitua o loo i ai ki e pulefaamalumalu ai.

“Ua ou iloina i lau galuega o i latou e faasolo ina leiloloa [ma] fenu-miai e masani lava o i latou ia e tele ina . . . galo ia i latou a saunoa loa le Au Peresitene Sili ma le Korama a Apose-tolo e Toasefululua i se leo autasi, o le siufofoga lava lea o le Alii mo lena taimi. Ua faamanatu mai e le Alii ia i tatou, ‘Pe i lo’u lava leo po o i le leo o a’u auauna, ua tutusa lava’ [MF&F 1:38].”⁵

I se isi faaupuga, latou te tuua le Vaa Tuai o Siona—latou te pauu ese; latou te liliuese. O le mea e faanoanoa ai, e tele lava ina latou oo i taunuuga mo se taimi puupuu ma mulimuli ane ai oo i taunuuga sa lei faamoemoeina mo se taimi umi, e le gata mo i latou lava ae faapena foi mo o latou aiga.

O o tatou taitai faale-Ekalesia i le lotoifale, e pei foi i latou o tagata taiala atamamai, sa aoaoina e aafiaga o le olaga; sa aotauina ma fautuaina e aposetolo ma perofeta ma isi taitai o le Ekalesia; ae o le mea sili ona taua, sa aoaoina patino e le Alii Lava Ia.

I se tasi taimi i lenei tausaga, sa ou lauga ai i le autalavou matutua o le Ekalesia i le faasalalauga o le faigalotu a le OAE ia Me. Sa ou fai atu:

“Ua ou faalogo e manatu nisi tagata e le iloa e taitai o le Ekalesia le mea moni o loo tutupu i le lalolagi. O le mea e galo ia i latou, o i matou o alii ma tamaitai ua lava le poto masani, ma ua matou ola i le tele o nofoaga ma galulue faatasi ma le tele o tagata mai tulaga eseese. O a matou tofiga faale-Ekalesia o i ai nei matou te malaga ai i le lalolagi atoa, lea matou te feiloai ai ma taitai faaupufai, faalelotu, faapisinisi, ma taitai o galuega alofa i le lalolagi. E ui ina matou asiasi atu i le Maota Paepae i Uosigitone D.C. faapea ai ma taitai o malo [ma isi lotu] i le lalolagi atoa, ae ua matou asiasi atu foi i [aiga ma tagata] sili ona limavaivai i le lalolagi. . . .

“A outou mafaufau loloto i o matou

olaga ma auaunaga, o le a outou ioeina lava ua matou vaaia ma tofo i le lalolagi i auala ua oo foi i ai isi. O le a outou iloaina e tele atu mea o loo tutupu ua matou vaaia i le lalolagi i lo le toatele o isi tagata. . . .

“ . . . O loo i ai se mea e uiga i le atamai o le tagata toatasi ma le atamai tuufaatasi o [taitai o le Ekalesia] ia e tatau ona outou maua ai sina mafanafana. Ua matou oo uma i ai, e aofia ai taunuuga o tulafono ma aiaiga faavae eseese faalemalo, faanoanoaga, faalavelave, ma maliu i o tatou lava aiga. E le o tāvavaeeseina i matou mai i o outou olaga.”⁶

Faatasi ai ma le tulafono muamua e pei ona ou faaogaina, ia manatua le tulafono lona lua ma le tolu: ia faia se ofufaaola i taimi uma, ma pipiimau uma lima e lua. O fetalaiaga a le Alii, o loo maua i tusitusiga paia ma aoaoga a aposetolo ma perofeta, ua Latou aumaia se fautuaga ma le taitaiga e faapea, a mulimulitaia, o le a avea o se ofufaaola faaleagaga ma o le a fesoasoani ia i tatou ia iloa ai le auala e pipiimau ai i lima uma e lua.

E manaomia ona avea i tatou e faapei o atalii o Mosaea o e na “malolosi i le malamalama o le upumoni.” E mafai ona tatou avea ma ni alii ma ni tamaitai “mafaufau lelei.” E na o le pau le mea e mafai ai ona ausiaina leni mea o loo tatou “suesue [lea] i tusitusiga paia ma le filiga, ina ia [tatou] iloa le afioga a le Atua.”⁷

I le suesueina ai o tusitusiga paia ma upu a aposetolo ma perofeta ua mavae ma onapo nei, e tatau ai ona tatou taulai atu i le suesueina, ola ai, ma le fiafia i le aoaoga faavae a Keriso.

E faaopoopo atu i le atiaaina o mausa o le faitauina o tusitusiga paia a le tagata lava ia, e manaomia ai ona tatou avea e pei o atalii o Mosaea ma tuu atu i tatou lava “i le tatalo tele ma anapogi.”⁸

E foliga mai o mea nei e le faigofie ona fuatiaina e matua taua lava. Ia faatumau le taulaiga i nei mea faigofie ma aloese mai mea faalavefau.

E pei ona ou iloaina tagata e le o nonofo i totonu o le vaa ma e le o pipiimau foi o latou lima uma e lua i taimi o tofotofoga ma faafitauli po o e foi e le o nonofo i totonu o le vaa i taimi o le malū o le tai, ua ou matauina ai foi o le toatele o i latou ua le o toe i ai so latou taulaiga i upumoni autu o le talalelei—o mafuaaga na ala ai ona latou auai i le Ekalesia i le taimi muamua lava, o mafuaaga na latou tumau ai i le tuuto atoatoa ma le toaaga e ola i tulaga faatonuina o le talalelei faapea ai ma le faamanuiaina o isi e ala atu i auaunaga tuuto ma faapaiaina, ma auala ua i ai le Ekalesia i o latou olaga “o se nofoaga o le tausiga faaleagaga ma le tuputupu ae.”⁹

Sa aoao mai e Iosefa Samita leni upumoni autu: “O mataupu faavae autu o la tatou tapuaiga o le molimau a aposetolo ma perofeta e faatatau ia Iesu Keriso, ‘e faapea na maliu o ia, sa tanumia, ma toetu mai i le aso tolu, ma afio ae i luga i le lagi;’ ma o isi mea ua na o ni faaopoopoga i nei mea, lea e faatatau i la tatou tapuaiga.”¹⁰



Afai tatou te faatumauina la tatou taulaiga i le Alii, ua folafola mai ia i tatou se faamanuiaga e le mafaatusaliaina: “O le mea lea, e tatau ai ona outou fetaomi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma. O le mea lea, afai tou te fetaomi atu i luma, ma taumamafa fiafia i le afioga a Keriso, ma tumau e oo i le iuga, faauta, ua faapea ona fetalai mai o le Tama: O le a outou maua le ola e faavavau.”¹¹

O nisi taimi e amata ai ona taulai atu tagata faamaoni o le Au Paia o Aso e Gata Ai ma tagata sailiili faamaoni i “mea faaopoopo” i lo o mataupu faavae autu. O lona uiga, e faaosooso i tatou e Satani ia faalavelaveina lo tatou taulai atu i le savali faigofie ma manino o le talalelei toefuataiina. O e ua faalavefauina e tele lava ina le toe aai ma feinu i le faamanatuga ona ua latou taulai atu, pe ua naunau atoa, i ni faiga masani po o ni aoaoga e itiiti se taua.

O isi atonu e taulai atu i fesili ma masalosologa o loo latou lagonaina. Ioe, o le i ai o ni fesili ma le lagonaina o le masalosalo o loo ogatusa lea ma le avea ai ma se soo tuuto. Talu ai nei, sa ta’ua ai e le Aufono a le Au Peresitene Sili ma le Korama a Aposetolo e Toasefululua e faapea: “Matou te malamalama mai lea taimi i lea taimi, o le a i ai pea ni fesili i tagata o le Ekalesia e uiga i aoaoga faavae, talafaasolopito, po o faiga masani a le Ekalesia. O loo saoloto pea tagata o le Ekalesia i taimi uma e fai mai ai na fesili ma saili atu ma le naunautai i se malamalama sili atu.”¹²

Manatua, sa i ai ni fesili a Iosefa Samita lava ia lea na amata ai le Toefuaiga. Sa avea o ia ma se tagata suesue ma, e pei o Aperaamo, sa ia mauaina ni tali i fesili sili ona taua o le olaga.

O fesili taua e taulai atu i le mea e sili ona taua—le fuafuaga a le Tama Faalelagi ma le Togiola a le Faola. O

la tatou sailiga e tatau ona taitai atu ai i tatou e ave ma ni soo agalelei, agamalu, agaalofo, lotofaamagalo, onosai, ma tuuto. E pei ona aoao mai Paulo, e tatau ona tatou loto e “fesui i a [tatou] avega e ave, ma ia faapea ona [tatou] faia le tulafono a Keriso.”¹³

O le tauave e le tasi o le avega a le isi e aofia ai le fesoasoani atu, lagoonosua, ma le malamalama i tagata uma, e aofia ai ē mamai, o ē vaivai, o ē matitiva i la le agaga ma la le tino, o ē suesue ma ē atuatuvaile, faapea ai foi ma isi soo o le au paia—e aofia ai taitai o le Ekalesia ua valaauina e le Alii e auauna atu mo se vaitau.

Uso e ma tuafafine, nonofo i totonu o le vaa, faaoga o outou ofufaaola, ma pipiimau i lima uma e lua. Aloese mai mea faalavefau! Ma afai e i ai se tasi o outou e pa’u ese mai le vaa, o le a matou saili ia te oe, maua oe, auauna atu ia te oe, ma toso mai oe ma le saogalemu i luga o le Vaa Tuai o Siona, lea o loo i ai le Atua lo tatou Tama ma le Alii o Iesu Keriso i le foenui ma o le a taialaina i tatou i le ala sa’o, ou te moliimau atu ai ma le faamaulalo i le suafa o Iesu Keriso, amene. ■

FAAMATALAGA

1. *Aooga a Peresitene o le Ekalesia: Polika Iaga* (1997), 82–83.
2. Brigham Young, “Discourse,” *Deseret News*, Jan. 27, 1858, 373.
3. Brigham Young, “Remarks,” *Deseret News*, Nov. 18, 1857, 291.
4. Alema 5:26.
5. M. Russell Ballard, “Mission Leadership” (lauga na tuuina atu i le semina mo peresitene fou o misiona, 25 Iuni, 2014), 8.
6. M. Russell Ballard, “Be Still, and Know That I Am God” (Faigalotu a le Ofisa o Aoga a le Ekalesia, 4 Me, 2014); lds.org/broadcasts.
7. Alema 17:2.
8. Alema 17:3.
9. Tusi a le Au Peresitene Sili ma le Korama a Aposetolo e Toasefululua, 28 Iuni, 2014.
10. Joseph Smith, *Elders’ Journal*, July 1838, 44.
11. 2 Nifae 31:20.
12. Tusi a le Au Peresitene Sili ma le Korama a Aposetolo e Toasefululua, 28 Iuni, 2014.
13. Kalatia 6:2.



Saunia e Elder Richard G. Scott

○ Le Korama a Aposetolo e Toasefululua

Ia Avea le Faaogaina o le Faatuatua ma Mea E te Faamuamua

E ui i le tele o huitau le lelei tatou te oo i ai i le olaga, ae e tatau lava ona tatou faaavanoaina se taimi e matua faaoga ai lo tatou faatuatua.

Ao i ai Atamu ma Eva i le Faa-toaga i Etena, o mea uma sa la manaomia e tasi ai o laua manaoga i aso taitasi sa foai tele atu ia i laua. Sa leai ni o laua faaaitauli, huitau, po o tiga. Talu ai la te lei oo i ni taimi faigata, sa leiloa e i laua e mafai ona la maua le fiafia. La te lei lagonaina lava le fesouaiga, o lea sa le lagona ai le filemu.

Sa mulimuli ane solia e Atamu ma Eva le poloaiga e aua ne’i ‘aia le fua o le laau e iloa ai le lelei ma le leaga. O le faia o lea mea sa lei toe tumau ai i laua i le tulaga o le ta’umamaina. Sa amata ona la tofo i mataupu faavae o le faafeagai o mea. Sa amata ona laua fetaiiai ma ma’i ia sa vaivai ai lo la soifua maloloina. Sa amata ona la lagonaina le faanoanoa faapea foi ma le olioli.

O le ‘aiina e Atamu ma Eva o le fua faasaina, na oo mai ai le malamalama o le lelei ma le leaga i le lalolagi.

O le la filifiliga ua mafai ai e i tatou taitoatasi ona o mai i lenei lalolagi ina ia faaosoosoina ma tofotofoina.¹ Ua faamanuiaina i tatou i le faitalia, o lo tatou tomali lea e faia ai faaiuga ma tali atu mo na faaiuga. O le Pa’u na mafai ai ona tatou lagona i o tatou olaga le fiafia ma le faanoanoa. Ua mafai ona tatou malamalama i le filemu ona ua tatou lagonaina le fesouaiga.²

Na silafia e lo tatou Tama o i le Lagi o le a tupu lenei mea ia i tatou. O se vaega uma lava o Lana fuafuaga atoatoa o le fiafia. Sa Ia saunia se ala i le soifuaga o Lona Alo usiusitai atoatoa, o Iesu Keriso, lo tatou Faaola, mo Lana Togiola ina ia manumalo i faaaitauli uma tatou te ono oo i ai i le olaga faaletino.

Ua tatou ola i taimi faigata. E le manaomia lo’u listiina atu o faapogai uma o le leaga i le lalolagi. E le manaomia le faamatalaina uma